

Evening Dogri (NSD) Bulletin 07-10-2023

आकाशवाणी

- एषियाई खेड्डे च भारत दा षानदार प्रदर्षन बरोबर जारी। सुन्ने दे 28, चांदी दे 38 ते कैंह दे 41 तगमे समेत कुल 107 तगमे हासल करियै भारत चौथे नंबरे पर बने दा ऐ।
- 100 तगमे दा आंकड़ा पार करने पर प्रधानमंत्री नरेन्द्र मोदी होरें भारतीय खडारिं गी ममारकबाद दिक्ती ऐ ते आक्खेआ ऐ जे औंदे मंगलवारें ओ खडारिं दा सुआगत ते उंदे कन्ने गल्लबात करगंन।
- जीएसटी काउंसल दी 52मीं बैठका च केन्द्री खजाना मंत्री निर्मला सीतारमण होरें दस्सेआ जे बैठका च जीएसटी अपील ट्रिव्यूनल दे इलावा बाजरा ते षीरे पर जीएसटी दरें बारे केई महत्वपूर्ण फैसले लैते गे न।
- केन्द्री गृहमंत्री अमित षाह होरें केन्द्री क्षेत्रीय परिशद दी उत्तराखंड दे टेहरी जिले च लग्गी दी बैठका दी अध्यक्षता कीती।
- हमास लड़ाकें आस्सेआ हमले दे बाद इस्रायल नै उत्थें “जंग आंगर दी स्थिति” दी घोशणा करी दिक्ती ऐ।
- केन्द्री साईंस ते टैक्नालाजी मंत्री डॉ. जितेन्द्र सिंह होरें आक्खेआ ऐ जे औंदे 25एं बरें च भारत दी अंतर्राष्ट्रीय बजारें च हिस्सेदारी 10 कोला 12 प्रतिषत दे बिच्च होग।

Asian Games

एषियाई खेड्डें च भारतीय खडारिं दा षानदार प्रदर्षन बरोबर जारी ऐ। हुनै कोला किष चिर पैहले तगर भारत आस्सेआ हासल कुल तगमे दी गिनतरी 107 तगर पुज्जी गेदी ही, जिंदे च 28 सुन्ने दे, 38 चांदी दे ते 41 कैंह दे तगमे षामल हे। एह पैहली बारी ऐ जे इनें खेड्डें च भारत आस्सेआ जित्ते गेदे तगमें दी गिनतरी 100 कोला उप्पर पुज्जी ऐ ते एषियाई, ओलंपिक्स ते राष्ट्रमंडल खेड्डें च एह दूई बारी ऐ जदूं भारतीय दल नै 100 कोला मत तगमे जित्ते न। एहदे षा पैहले 2010 च नमीं दिल्ली च आयोजित राष्ट्रमंडल खेड्डें च बी भारत नै 101 तगमे जित्ते हे। सुन्ने दा ताजा मैडल कौड्डी दी भारती टीम नै इरान गी 33–29 कन्ने हराइयै जित्तेआ ऐ। मर्दे दी भारतीय क्रिकेट टीम नै बी अफगानिस्तान

खलाफ फाइनल मैच बरखा कारण रद्द होई जाने पर सुन्ने दा तगमा हासल कीता। कुष्ती च दीपक पुनिया नै 86 किलोग्राम फ्री स्टाइल वर्ग च चांदी दा तगमा जित्तेआ। महिला हॉकी टीम नै जपान गी 2-1 कन्ने हराइयै कैंह दा तगमा हासल कीता। तोआई चिराग शेट्टी ते सत्विक साई राज रंकीरेड्डी दी जोड़ी नै बैडमिंटन दे डबल्स मकाबले च सुन्ने दा तगमा अपने नां कीता। उनें दक्खन कोरिया दे चोए सोल्गयू ते किम वान-हू दी जोड़ी गी 21-18, 21-16 कन्ने हराया। एह पैहली बार ऐ जे भारत ने एषियाई खेड्डें च बैडमिंटन च सुन्ने दा तगमा जित्तेआ ऐ। अज्ज जित्ते गेदे होर बाकी सुन्ने दे तगमे महिलाएं दी कोड्डी ते मर्दे दे तीरंदाजी दे मकाबले च भारत नै हासल कीते न। खीरी जानकारी थ्होने तगर भारत सुन्ने दे 28 तगमे सनें कुल 107 तगमें कन्ने इनें खेड्डें च चौथे नंबरै पर हा।

PM Congrats

प्रधानमंत्री नरेन्द्र मोदी होरें एषियाई खेड्डें च सौ तगमे हासल करने पर इनें खेड्डें च हिस्सा लैने आले खडारिएं गी ममारकबाद दितती ऐ। श्री मोदी होरें इक सोशल मीडिया पोस्ट च आक्खेआ ऐ जे एषियाई खेड्डें च एह भारत लेई इक महत्वै आली उपलब्धि ऐ। उनें आक्खेआ जे भारत दे लोकें गी इस गल्ला खुषी होई ऐ जे असें 100 तगमें हासल करने आला इक खास संगेमील हासल करी लैता ऐ। प्रधानमंत्री मोदी होरें उनें अथलीटें गी ममारखां दित्तियां जिंदी कोषे कन्ने भारत गी एह इतिहासक उपलब्धि हासल होई ऐ। मोदी होरें आक्खेआ ऐ जे उनें एषियाई खेड्डें च शामिल होने आले खडारिएं दी मंगलवारें मेजबानी करने ते उंदे कन्ने गल्लबात करने दी हिक्खी लाई दी ऐ।

PM-Meet

प्रधानमंत्री नरेन्द्र मोदी होरें दिल्ली च आज्ञादी आले ध्याड़े पर लाल किले थमां दित्ते गेदे अपने भाशण च कीती गेदी घोशणाएं दा जायजा लैने लेई अज्ज इक महत्वै आली मीटिंग लोआई। आज्ञादी आले ध्याड़े पर अपने भाशण च श्री मोदी होरें गरीब-गूरबें ते दरमयाने तबकें दे लोकें गी मकान बनाने लेई किफायती कर्जा उपलब्ध कराने गी जकीनी बनाने लेई आक्खेआ हा। उनें इस घोशणा गी लागू करने गी लेइयै कीती गेदी तैआरिएं दा जायजा लैता। प्रधानमंत्री होरें अपने भाशण च घरें च सौर ऊर्जा गी जकीनी बनाने दा जिक्र कीता हा। उनें इस स्कीम गी अमल च आनने दी तैआरिएं दा बी जायजा लैता।

Sitharaman

केन्द्री खजाना मंत्री निर्मला सीतारमण हुंदी अध्यक्षता च अज्ज नमीं दिल्ली च जीएसटी परिशद दी 52मीं बैठक लग्गी। बैठका च केन्द्री खजाना राज्य मंत्री पंकज चौधरी हुंदे कन्नै राज्यें ते केन्द्र षासत प्रदेशें दे खजाना मंत्रिएं बी हिस्सा लैता। बैठक दे बाद संवाददाताएं गी जानकारी दिंदे होई खजाना मंत्री होरें दस्सेआ जे बैठका जीएसटी अपीलीय ट्रिव्यूनल दे इलावा बाजरा ते षीरे पर जीएसटी दिएं दरें बारे बी महत्वपूर्ण सोच बचार ते फैसले लेते गे। उनें दस्सेआ जे परिशद नै षीरे पर जीएसटी 28 प्रतिषत कोला घटाइयै 5 प्रतिषत करने दा फैसला लैता ऐ जेह्दे नै गन्ना करसानें गी फायदा होग। उनें दस्सेआ जे 70 प्रतिषत बाजरा युक्त आटा खुल्ले च बेचे जाने पर कोई जीएसटी नेई लग्गोग पर जेकर इसी पैक करियै ते मार्का लाइयै बेचेआ जंदा ऐ तां एह्दे पर 5 प्रतिषत जीएसटी लग्गोग। जीएसटी अपीलीय ट्रिव्यूनल दे बारे च कीते गेदे बदलावें बारे सीतारमण होरें दस्सेआ जे ट्रिव्यूनल दे अध्यक्ष दी बद्धोबद्ध उमर दी हद 70 बरे होग जिसलै जे एह्दे मिनबरें दी उमर बद्धोबद्ध हद 67 बरे रक्खी गई ऐ।

Amit Shah

केन्द्री गृह मंत्री अमित षाह होरें अज्ज उत्तराखंड च केन्द्री जोनल काउंसल दी 24मीं बैठक दी प्रधानता कीती। इस मौके उनें आखेआ जे प्रधानमंत्री मोदी हुंदे नेतृत्व तैह्त् जोनल काउंसलां छड़ी सलाहकार दी भूमका छोड़ियै असरदार कारवाई आले मंचें दे तौर पर सामने आइयां न। उनें मुल्ले च पानी दी सप्लाई दे मामले च केन्द्री जोनल काउंसल दे दायरे हेठ औने आले राज्यें दे महत्व गी दोहराया। षाह होरें बच्चें च कुपोशण दी समस्या दूर करने दी जरूरतै पर बी जोर दित्ता। उनें राज्यें गी अपील कीती जे ओह संवेदनशीलता दे कन्नै कुपोशण खलाफ लड़ाई लड़न। उनें आखेआ इस काउंसल च षामल मध्यप्रदेश, उत्तर प्रदेश, उत्तराखंड ते छत्तीसगढ़ राज्यें दा मुख्ख दी जीडीपी ते विकास च बड़ा बड़डा योगदान ऐ। षाह होरें आखेआ जे प्रधानमंत्री होरें सदा गै सहकारी संघवाद दी भावना गी मजबूत करने पर जोर दित्ता ऐ ते एह्दे तैह्त् इलाकाई काउंसलें, समस्याएं दा हल्ल कड्डने, माली समावेश बधाने ते नीतिगत बदलावें च बड़ी महत्वै आली भूमका नभाई ऐ। उनें आखेआ जे हुन मुख्ख भरै दे करसानें दा 100 फीसद दलहन, तिलहन ते मक्क घट्टोघट्ट समर्थन मुल्ल पर नाफेड आस्सेआ खरीदेआ जाग। बैठक च उत्तराखंड दे मुख्खमंत्री पुश्कर सिंह धामी ते उत्तर प्रदेश दे मुख्खमंत्री योगी आदित्यनाथ षामल होए। मध्यप्रदेश दे मुख्खमंत्री षिवराज सिंह चौहान होरें वीडियो कांफ्रेंसिंग राएं बैठक च हिस्सा लैता। बैठक च छत्तीसगढ़ दे गृह मंत्री, केन्द्री गृह सचिव, अंतर राज्य परिशद सचिवालय दी सचिव सदस्य राज्यें दे मुख्ख सचिव ते राज्य सरकारें ते केन्द्री मंत्रालयें ते मैहकमें दे वरिष्ठ अधिकारी बी मजूद हे।

Israel-HAMAS

फलस्तीन दे हमास लड़ाकें आस्सेआ अज्ज गाजा पट्टी थमां राकेट दागे जाने दे बाद इस्रायल नै जंग आंगर दी स्थिति दी घोषणा करी दित्ती ऐ। हमास नै दक्खनी इजरायल च ज्हारें दी गिनतरी राकेट दागे। एह इस्रायल पर हमास दी तरफा पिछले केइए बरें च कीता गेदा अजें तोड़ी दा सब्बने षा बड्डा हमला ऐं खबरें मूजब हमास दे बंदूक धारिएं इस्रायल दे अंदर बड़ियै इक महिला दी बी हत्या करी दित्ती ते 15एं होरने लोकें गी घायल करी दित्ता ऐ। पूरे इस्रायल च जंगी जहाजें दे सायरन सनोचा करदे न। इस्रायल दी फौज नै इस गल्ले दी तस्दीक कीती ऐ जे गाजा सीमा पर केई थाहरें घुसपैठ होई ऐ। इस्राइली सेना नै जवाबी कारवाई पुरु करी दित्ती ऐ ते नागरिकें गी अपने घरै अंदर गै रौहने दी सलाह दित्ती ऐ। प्रधानमंत्री बेन्यामिन नेतन्याहू होरें बड्डे सुरक्षा अधिकारिएं दी अमरजंसी बैठक सद्दी जिसलै जे इस्रायल दे सुरक्षा मंत्रिमंडल दी बी अज्ज दपैहरी मगरा राजधानी तेल अवीव च सेना मुख्यालय च बैठक होई। नेतन्याहू हुंदे दफतरै मूजब देष दी सुरक्षा स्थिति दा आकंलन कीता जा'रदा ऐ। इस्रायल दे बन्ने कन्नै लगदी गाजा पट्टी च केई हफते थमां स्थिति तनोतनी आली ते गंभीर बनी दी ही ते पच्छमी तट पर संघर्ष जारी हा। दस्सेआ जा'रदा ऐ जे इनें घटनाएं च इस ब'रे इस्रायली फौज दे हत्था दो सौ कोला मते फलीस्तिनी मारे गे न।

PM-Israel Attacks

प्रधानमंत्री नरेन्द्र मोदी होरें इस्रायल च आतंकी हमले दी खबर पर गैहरा सदमा बुज्जेआ ऐ। अपनी इक सोषल मीडिया पोस्ट च मोदी होरें आक्खेआ जे भारत दियां प्रार्थनां हमले दे षकार बेकसूर लोकें ते उंदे परिवारें कन्ने न। उनें गलाया जे इस ओक्खी घड़ी च भारत दी पूरी हमदर्दी इस्रायल कन्नै ऐ।

India Israel

भारत नै इस्रायल च रवा करदे अपने नागरिकें गी पूरी चाल्ली सौहगे सतर्क रौहने ते सुरक्षा नियमं दी पालमा करने दी सलाह जारी कीती ऐ। इस्रायल च भारतीय दूतावास नै अपने लोकें गी आखेआ ऐ जे ओ सुरक्षत आसरमें च रौहने ते कुसै बी कठनाई दे समें च ओ 97235226748 नंबर पर फोन करी सकदे न जां पही con1.telaviv@mea.gov.in पर सनेआ पाई सकदे न।

Air Force

भारतीय वायु सेना कल अपने 91में स्थापना दिवस दे मौके पर उत्तर प्रदेश दे प्रयागराज च अपना नमां प्रतीक चिन्ह जारी करोग। वायु सेना प्रमुख एयर चीफ मार्शल बी.आर.चौधरी होर प्रयागराज दे बामरौली च वायु सेना दिवस परेड दरान इस नमें प्रतीक चिन्ह गी जारी करगंन। इस मौके ब्हाई फौज संगम क्षेत्र च एयर षो बी करोग।

RAF

केन्द्री गृह राज्य मंत्री नित्यानंद राय होरें आखेआ ऐ जे तुरत कारवाई बल आरएएफ कनून बवस्था दी स्थिति कन्नै निबड़ने दी अपनी अनोखी षक्ति ते छमता दे कारण इक बेहतररीन बल बनी गेदा ऐ। अज्ज नमीं दिल्ली च रेपिड एक्शन फोर्स दे 31में स्थापना दिवस दे मौके पर लेआए गेदे इक समारोह दरान उनें आखेआ जे देश विदेश थमां हासल सख्त ते माहिराना सिखलाई दी बदोलत अज्ज एह बल भीड़, हिंसा ते दंगें फसाद दी स्थिति कन्नै निबड़ने च पूरी चाल्ली सक्षम ऐ। उनें आखेआ जे रैपिड एक्शन फोर्स नै जम्मू कष्मीर, मणिपुर ते नूह च हिंसक घटनाएं कन्नै निबड़दे होई अपनी छमता दा मजायरा कीता ऐ।

Jatinder Singh

केन्द्री मंत्री डॉ. जितेन्द्र सिंह होरें अज्ज आखेआ ऐ जे भारत चिकित्सा प्रोद्योगिकी ते उपकरणें दा इक महत्वपूर्ण कुल संसारी केन्द्र बनने लेई तैआर ऐ। उनें आखेआ जे मुख्ये च चिकित्सा उपकरण बाजार मजूदा समें च 11 बिलियन डॉलर दा ऐ जेहड़ा 2050 तगर 50 अरब डॉलर कोला पार होई जाने दी मेद ऐ। एह गल्ल उनें अज्ज अंतर्राष्ट्रीय सेहत दिक्खभाल प्रोद्योगिकी दे 8में सलाना सम्मेलन गी संबोधत करदे होई आखी। उनें आखेआ जे भारत दुनिया दे 5 सब्बनें षा बड़डे चिकित्सा उपकरण दे निर्माताएं च षामल ऐ। डॉ. सिंह होरें आखेआ जे औंदे 25एं बरे च अंतर्राष्ट्रीय बजार च भारत दी हिस्सेदारी मजूदा डेढ प्रतिषत कोला बधियै 10 जां 12 प्रतिषत तगर पक्क गै पुज्जी जाग।

Conference Terror

राष्ट्री जांच अजेंसी एनआईए पास्सेआ नमीं दिलली च आयोजित आतंकवाद-रोधी दऊं ध्याडें दा सम्मेलन संपन्न होई गोआ ऐ। इस मौके एनआईए दस्तें ते युनिटें आतंकवादी खतरें दा मकाबला करने लेई आपसी तालमेल होर बधाने दा प्रण पाया ऐ। सम्मेलन च हिस्सा लैने आले डेलीगेटें, मुखे च आतंकवादी तंत्र गी भलेआं खत्म करने ते आतंकवादी गतिविधिं लेई जारी होने आले रपे-पैसे पर रोक लाने सरबंधी बक्ख-बक्ख मामलें पर बचार बटांदरा कीता। सम्मेलन दे समापन सत्र दी प्रधानता करदे होई केन्द्री गृह सचिव अजय कुमार भल्ला होरें आतंकवादी ढांचे गी खत्म करने लेई केन्द्र ते राज्यें दिएं अजेंसिं बष्कार तालमेल ते ठोस जतनें दी जरूरतै पर लोड पाई। उनें आतंकवाद खलाफ लड़ाई च केन्द्र ते राज्यें दिएं अजेंसिं गी इक मुमकन मदाद देने दा भरोसा बी दोआया ऐ।

BSF-Passing Prade

बीएसएफ दे हुमहामा बडगाम आले सब्सिडायरी सिखलाई केन्द्र च कांस्टेबल बैच दी पासिंग आउट परेड दा सरिस्ता कीता गोआ जेह्दे च 115 रंगरूट कांस्टेबलें गी बीएसएफ च षामल कीता गोआ। बीएसएफ दी कष्मीर फ्रंटियर दे आईजी अषोक यादव होर कार्यक्रम दे मुख् परौहने हे। उनें बक्ख-बक्ख गतिविधिं च षानदार प्रदर्शन करने आले रंगरूटें गी तगमे भेंट कीते। 24एं हफते दी अवधि आली इस सख्त सिखलाई दरान इनें रंगरूटें गी बक्ख-बक्ख थेआर चलाने ते होरने सरबंधत जानकारियां दित्तियां गेइयां।

LG-Wildlife

उपराज्यपाल मनोज सिन्हा होरें जैव बन्न-सबन्नता ते जंगली जीव जैतुएं दी हिफाजत लेई समुदाय आस्सेआ अगुवाई कीते जाने दा आह्वान कीता ऐ। उनें आक्खेआ जे पर्यावरण सरबधी सरिस्ते गी तगडा करना,साढी नदिएं ते झीलें दी असल षान गी ब्हाल करना, तस्करें ते षकारिं थमां साढे जंगलें दी हिफाजत करना साढे सामूहिक जिम्मेवारी ऐ। उपराज्यपाल होरें अज्ज श्रीनगर च वाल्क फॉर वाईल्ड लाईफ वॉकथॉन गी झंडी दस्सियै रवाना कीता। एह द्रौड जंगली जीवेम दी हिफाजत सरबंधी मनाए जा करदे 2023 आले हफते दा हिस्सा ही। एह द्रौड पुलस गोल्फ कोर्स कोला लेइयै निषात बाग तोड़ी लाई गेई। जंगली-जीव-जैतुएं दी हिफाजत आले मैहकमे आस्सेआ जंगली जीवेम दी हिफाजत गी लेइयै जागरूकता पैदा करने लेई इस द्रौड दा आयोजन कीता गेदा हा। एह्दे च प्रमुख नागरिकें,जंगली

जीवेम दी हिफाजत ते पर्यावरण सरबंधी क्लब दे मिंबर, स्वयंसेवी एनसीसी दे कैंडेट ते बड़ी मती गिनतरी च विद्यार्थी षामल होए दे हे। उपराज्यपाल होरें जंगली जीव-जैन्तुएं दे रौहने आली थाहरें दे एकीकृत विकास लेई केन्द्री षासत प्रदेश दे प्रषासन आस्सेआ कीती गेदी कोषेणें दी जानकारी सांझा कीती। उनें पर्यावरण मुआफक सेलसफा ते अर्थ-बवस्था गी बढावा देने सरबंधी कीती गेदी कोषेणें बारे बी दस्सेआ।
